

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKAH SAHIH/BAHASA MALAYSIA**

<http://www.parlimen.gov.my>

**HARI SELASA, 21 MAC 2017, PUKUL 10.00 PAGI**

**Bil. 5**

---

**WAKTU PERTANYAAN-PERTANYAAN MENTERI**

1. PR-1351-MQT0041  
**Tuan Anuar Bin Abd Manap [ Sekijang ]** minta **MENTERI KEMAJUAN LUAR BANDAR DAN WILAYAH** menyatakan berapakah jumlah permohonan yang telah diterima bagi pembinaan Rumah Bina Negara mengikut agensi yang bertanggungjawab iaitu RISDA dan FELCRA dan berapakah jumlah permohonan yang telah diluluskan serta apakah perkembangan status pembinaan rumah tersebut bagi permohonan yang telah diluluskan.
2. PR-1351-MQT0044  
**Dato' Johari Bin Abdul [ Sungai Petani ]** minta **MENTERI WILAYAH PERSEKUTUAN** menyatakan adakah Kerajaan berhasrat meningkatkan taraf kebersihan Kuala Lumpur khususnya di kawasan tumpuan pelancong seperti Kampong Baru, Chow Kit dan Masjid India agar setanding dengan bandaraya-bandaraya seperti negara Korea Selatan, Australia dan New Zeland.
3. PR-1351-MQT0026  
**Dato' Abdullah Sani Bin Abdul Hamid [ Kuala Langat ]** minta **MENTERI SUMBER MANUSIA** menyatakan berhubung Perjanjian "Railway Network Access Agreement" (RNAA) yang akan menjejaskan perkhidmatan pekerja-pekerja Keretapi Tanah Melayu Berhad (KTMB). Apakah jaminan pekerjaan kepada pekerja-pekerja KTMB sekiranya RNAA ditandatangani dan dilaksanakan.

**MALAYSIA****DEWAN RAKYAT****ATURAN URUSAN MESYUARAT****NASKHAH SAHIH/BAHASA MALAYSIA**<http://www.parlimen.gov.my>**HARI SELASA, 21 MAC 2017, PUKUL 10.00 PAGI****Bil. 10**

---

**WAKTU PERTANYAAN-PERTANYAAN MENTERI**

---

**PERTANYAAN-PERTANYAAN BAGI JAWAB LISAN**

1. PR-1351-L00553  
**Dato' Abd Aziz Bin Sheikh Fadzir [ Kulim Bandar Baru ]** minta **MENTERI DALAM NEGERI** menyatakan statistik terkini jumlah penagih dadah serta tangkapan yang dilakukan semenjak tahun 2015 dan tahun 2016. Apakah langkah-langkah yang lebih efisien diambil oleh Kementerian bagi membanteras penyalahgunaan dadah daripada berleluasa.
2. PR-1351-L01339  
**Tuan Sivakumar Varatharaju Naidu [ Batu Gajah ]** minta **MENTERI PELANCONGAN DAN KEBUDAYAAN** menyatakan hubungan Malaysia - India dalam mempromosikan pelancongan dan kebudayaan masing-masing. Nyatakan jumlah pelancong dari India yang datang mengunjungi Malaysia dan jumlah pelancong Malaysia yang melawat India bagi tempoh 5 tahun yang lalu.
3. PR-1351-L00439  
**Tuan Budiman Bin Mohd Zohdi [ Sungai Besar ]** minta **MENTERI PENDIDIKAN** menyatakan berapakah jumlah dana tersedia Kumpulan Wang Amanah Pelajar Miskin (KWAPM) bagi tahun 2017 dan berapakah jumlah semasa penerima manfaat di bawah tabung ini.
4. PR-1351-L00930  
**Tuan Mohamed Hanipa Bin Maidin [ Sepang ]** minta **MENTERI SUMBER MANUSIA** menyatakan :-
  - (a) berapakah jumlah sebenar buruh kanak-kanak dalam negara ini setakat bulan Februari 2016 dan senarai-senarai majikan yang "employ" buruh kanak-kanak; dan
  - (b) adakah negara ini menjadikan satu kesalahan jenayah ke atas para majikan yang "employ" buruh kanak-kanak, dan jika ya, berikan butiran lengkap senarai para majikan yang telah didakwa.

5. PR-1351-L00061  
**Datuk Sapawi Bin Ahmad Wasali [ Sipitang ]** minta **MENTERI KESIHATAN** menyatakan pada tahap manakah "ranking" tahap kesihatan di Malaysia mengikut piawaian antarabangsa, dan apakah jumlah doktor yang ada sekarang ini memenuhi jumlah yang diperlukan bagi mencapai status kesihatan bertaraf dunia.
6. PR-1351-L00562  
**Dato' Kamarul Baharin Bin Abbas [ Telok Kemang ]** minta **MENTERI KEWANGAN** menyatakan penjelasan berkaitan rancangan dan pelaksanaan pencaruman yang dicadangkan di mana penjawat awam mencarum ke dalam Kumpulan Wang Persaraan (KWP) sehingga bersara.
7. PR-1351-L00480  
**Dr. Mansor Bin Abdul Rahman [ Sik ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah langkah standard operasi (SOP) yang telah ditetapkan oleh Kementerian dalam menyediakan Taska dapat membantu pihak-pihak yang berminat dan sejauh manakah pemantauan dilakukan oleh Kementerian dalam menangani pusat jagaan supaya tidak berlaku seperti di Taska di Kajang baru-baru ini.
8. PR-1351-L00705  
**Datuk Mohd Idris Bin Jusi [ Batu Pahat ]** minta **MENTERI PENDIDIKAN** menyatakan jumlah dan senarai sekolah yang telah menerima Program DWI-BAHASA (DLP) secara sukarela dan apakah langkah-langkah Kementerian menangani masalah buku teks dan bahan-bahan pengajaran-pembelajaran, kompetensi bahasa para guru dan murid-murid.
9. PR-1351-L01351  
**Tuan Khoo Soo Seang [ Tebrau ]** minta **PERDANA MENTERI** menyatakan adakah JAKIM akan mempertimbangkan khidmat konsultasi percuma kepada perusahaan kecil dan sederhana pelbagai bangsa mengenai permohonan status halal restoran agar mereka dapat memperluaskan pasaran mereka kepada peniagaan halal tanpa bergantung kepada konsultan orang tengah untuk permohonan.
10. PR-1351-L00959  
**Dato' Dr. Mujahid Bin Yusof Rawa [ Parit Buntar ]** minta **MENTERI PENDIDIKAN TINGGI** menyatakan apakah langkah-langkah Kerajaan untuk memastikan pelajar-pelajar yang layak ke universiti awam dapat melanjutkan pelajaran mereka ke universiti berkenaan.
11. PR-1351-L00008  
**Dato' Haji Abdul Rahman Bin Mohamad [ Lipis ]** minta **MENTERI KESIHATAN** menyatakan rasional pihak kerajaan meningkatkan caj rawatan pesakit di Klinik Pergigian Kerajaan yang mana kita sedia maklum pesakit Hospital Kerajaan ini terdiri daripada golongan yang kurang berkemampuan.

12. PR-1351-L01084

**Tuan Teo Kok Seong [ Rasah ]** minta **MENTERI PENDIDIKAN** menyatakan :-

- (a) status terkini mengenai pembinaan semula bangunan SJK (T) Desa Cempaka, Nilai yang terbakar pada tahun 2016. ; dan
- (b) adakah Kementerian Pendidikan Malaysia akan menanggung semua kos untuk membina semula sekolah tersebut dan bila ia akan dilaksanakan.

13. PR-1351-L00025

**Datuk Haji Shabudin Bin Yahaya [ Tasek Gelugor ]** minta **MENTERI KESIHATAN** menyatakan apakah langkah proaktif Kementerian bagi mengawal peningkatan permasalahan mental dalam kalangan masyarakat Malaysia terutamanya golongan yang berumur di antara 16 hingga 19 tahun dan yang berpendapatan rendah.

14. PR-1351-L01166

**Puan Alice Lau Kiong Yieng [ Lanang ]** minta **MENTERI PENDIDIKAN** menyatakan bilangan guru sementara di Sarawak dan bilangan guru dari Semenanjung yang ditempatkan di Sarawak serta apakah rancangan Kementerian untuk membantu guru sementara yang diberhentikan kerja.

15. PR-1351-L00019

**Datuk Dr. Ewon Bin Ebin [ Ranau ]** minta **MENTERI KEMAJUAN LUAR BANDAR DAN WILAYAH** menyatakan :-

- (a) apakah tindakan penyelesaian jangka pendek dan jangka panjang yang diambil oleh pihak Kementerian bagi mengatasi masalah bekalan air bersih di daerah Ranau, terutama sekali ketika musim hujan, di mana sumber bekalan air dicemari oleh banjir lumpur; dan
- (b) bilakah ianya dilaksanakan dan jumlah dana yang diperuntukkan.

16. PR-1351-L01369

**Puan Teo Nie Ching [ Kulai ]** minta **MENTERI PENDIDIKAN** menyatakan :-

- (a) sama ada Kementerian membenarkan guru yang baru bersalin untuk memerah susu untuk anak mereka di tempat kerja; dan
- (b) pendekatan Kementerian untuk memastikan tempat kerja adalah "breastfeeding friendly"

17. PR-1351-L00432  
**Tuan Che Mohamad Zulkifly Bin Jusoh [ Setiu ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan jumlah aduan dan tindakan yang telah diambil terhadap peniaga yang melanggar peraturan di bawah Akta Kawalan Harga dan Anti Pencatutan 2011 sejak akta tersebut dikuatkuasakan.
18. PR-1351-L00648  
**Tuan Sim Chee Keong [ Bukit Mertajam ]** minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah suri rumah tangga, pecahan ikut gender, negeri, kaum dan kurungan pendapatan keluarga. Nyatakan peratusan perempuan yang menjadi suri rumah tangga.PR-1351-L00019
19. PR-1351-L00263  
**Datuk Dr. Haji. Abd. Latiff Bin Ahmad [ Mersing ]** minta **MENTERI TENAGA, TEKNOLOGI HIJAU DAN AIR** menyatakan apakah bantuan Kerajaan khususnya dari Kementerian ini bagi menyelesaikan isu kemarau yang melanda daerah Mersing terutamanya masalah di takungan air di Ampangan Chongok, Mersing.
20. PR-1351-L01325  
**Tuan Fong Kui Lun [ Bukit Bintang ]** minta **MENTERI KESIHATAN** menyatakan berikutan pengurangan peruntukan untuk kementeriannya bagi 2017, bagaimanakah kementerian mengatur langkah untuk operasi memerangi wabak denggi seperti penularan demam denggi di kawasan perumahan awam dan di Kompleks Majlis Sukan Negara baru-baru ini.
21. PR-1351-L00054  
**Datuk Wilson Ugak Anak Kumbong [ Hulu Rajang ]** minta **MENTERI PERTAHANAN** menyatakan :-  
(a) adakah pihak Kementerian bercadang untuk menaik taraf jalan menuju ke Kampung Lusong Laku dan ke Kampung Long Busang di bawah Projek Jiwa Murni; dan  
(b) apakah status terkini Jalan Belaga - Nanga Merit yang sedang dibina di bawah projek ini.
22. PR-1351-L00718  
**Puan Teresa Kok Suh Sim [ Seputeh ]** minta **MENTERI PENDIDIKAN** menyatakan apakah perkembangan terkini terhadap sekolah terbengkalai, iaitu Sekolah Kebangsaan Danau Perdana di Kuala Lumpur. Apakah Kementerian mempunyai rancangan untuk jual tanah sekolah ini kepada pihak swasta.

23. PR-1351-L01321  
**Datuk Haji Mohd Fasih Bin Mohd Fakeh [ Sabak Bernam ]** minta **MENTERI DALAM NEGERI** menyatakan kadar jenayah kongsi gelap, maksiat dan perjudian di seluruh negara bagi tempoh 5 tahun ini dan nyatakan punca dan langkah yang diambil bagi membendung kegiatan-kegiatan jenayah ini terutamanya di Selangor.
24. PR-1351-L01227  
**Dato' Mansor Bin Othman [ Nibong Tebal ]** minta **MENTERI PERTANIAN DAN INDUSTRI ASAS TANI** menyatakan status pelaksanaan Program Agroprenuer Muda yang dibentangkan oleh Kerajaan dalam bajet 2016.
25. PR-1351-L00793  
**Dato' Ahmad Fauzi Bin Hj Zahari [ Setiawangsa ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan sejauh manakah keberkesanan aplikasi Ez-ADU yang telah dilancarkan pada tahun 2015 dan berapakah jumlah aduan yang diterima sejak ianya dilancarkan.
26. PR-1351-L00520  
**Dato' Mohd Ariff Sabri Bin Abdul Aziz [ Raub ]** minta **PERDANA MENTERI** menyatakan :-
- (a) mengikut maklumat terkini, Koperasi Permodalan Felda Berhad (KPF) mempunyai 5.8% saham dalam FGV. Apa telah jadi kepada rancangan asal memberi KPF 37% dalam FGV; dan
  - (b) berapakah wang yang diperolehi oleh KPF dengan menyerahkan 51% kepentingan dalam Felda Holdings.
27. PR-1351-L01115  
**Dato' Sri Ikmal Hisham Bin Abdul Aziz [ Tanah Merah ]** minta **MENTERI DALAM NEGERI** menyatakan berapa jumlah warga asing yang kini berada di negara ini dan dalam sektor manakah mereka terlibat.
28. PR-1351-L00876  
**Dato' Seri Haji Abdul Hadi Bin Awang [ Marang ]** minta **PERDANA MENTERI** menyatakan bilakah Menteri kabinet dan Ketua Setiausaha (KSU) mahu mengisytiharkan aset secara terus kepada SPRM berikutan indeks persepsi rasuah 2016 semakin menurun.

29. PR-1351-L01101  
**Dato' Seri Tiong King Sing [ Bintulu ]** minta **MENTERI PERTANIAN DAN INDUSTRI ASAS TANI** menyatakan :-
- (a) jumlah dan senarai nama syarikat pemegang lesen pengeksportan sarang burung walit ke China yang telah diluluskan ; dan
  - (b) apakah kriteria Kementerian dalam meluluskan pemegang lesen tersebut dan kawalan terhadap para pemegang lesen.
30. PR-1351-L01186  
**Puan Kasthuriraani A/P Patto [ Batu Kawan ]** minta **MENTERI DALAM NEGERI** menyatakan bilangan tahanan yang mati di bawah jagaan Jabatan Imigresen setiap tahun dari 2010 hingga 2016 mengikut umur, jantina, depot tahanan, negara asal, tempat dan sebab kematian, dan jika tahanan tersebut Rohingya atau pelarian / pemohon suaka yang berdaftar dengan UNHCR.
31. PR-1351-L01131  
**Tuan Ng Wei Aik [ Tanjong ]** minta **MENTERI SUMBER ASLI DAN ALAM SEKITAR** menyatakan bilakah cukai petak akan dilaksanakan berikutan Akta Hak milik Strata pindaan tahun 2016 telah diwartakan bagi pelaksanaan mulai 1 Januari 2017 dan apakah usaha yang akan diambil oleh pihak Kementerian untuk memastikan urusan niaga/pindah milik yang berkaitan tidak dapat dijalankan jikalau seseorang pemilik mempunyai tunggakan caj servis yang belum dijelaskan walaupun cukai petaknya telah dibayar.
32. PR-1351-L00475  
**Datuk Raime Bin Unggi [ Tenom ]** minta **MENTERI DALAM NEGERI** menyatakan adakah usaha pihak Kerajaan untuk mengatasi masalah penduduk luar bandar yang tidak memiliki Surat Beranak.
33. PR-1351-L91382  
**Datuk Seri Panglima Haji Abdul Ghapur Bin Salleh [ Kalabakan ]** minta **MENTERI PENGANGKUTAN** menyatakan berikutan dengan beberapa insiden bot pelancongan karam mahupun hilang, apakah Kementerian akan mewujudkan dan menguatkuasakan undang-undang atau peraturan ketat untuk pemilik dan pengendali bot-bot pelancongan agar industri ini menjamin keselamatan dan keselamatan pengguna.
34. PR-1351-L00186  
**Datuk Dr. Makin @ Marcus Mojigoh [ Putatan ]** minta **PERDANA MENTERI** menyatakan :-
- (a) jenis tindakan yang telah dan boleh diambil ke atas individu mahupun organisasi yang sengaja memberikan publisiti buruk ke atas sistem pengurusan dan kepimpinan negara, terutama sekali dalam sistem penyampaian negara ini; dan

(b) adakah mereka ini boleh dianggap sebagai pengkhianat negara.

35. PR-1351-L01247

**Tuan Julian Tan Kok Ping [ Stampin ]** minta **PERDANA MENTERI** menyatakan langkah kerajaan seperti yang dijanjikan dalam usaha kerajaan bagi menggalakkan serta mengawal selia keusahawanan perkhidmatan ride sharing yang wujud seperti syarikat UBER serta GRABCAR. Apakah wujudnya insentif Kerajaan bagi menggalakkan usahawan tempatan dalam membangunkan industri sedemikian.

36. PR-1351-L00674

**Tuan Lim Guan Eng [ Bagan ]** minta **MENTERI KERJA RAYA** menyatakan jumlah dividen diterima Kerajaan Pusat daripada syarikat-syarikat konsesi lebuh raya sehingga kini. Berapakah jumlah perlu dibiayai untuk mengambil alih semua syarikat konsesi dalam negara. Jelaskan kenapa rakyat masih perlu membayar tol Lebuh raya Utara - Selatan dan Jambatan Pertama Pulau Pinang walaupun tempoh konsesi telah tamat dan kutipan sedia ada telah melebihi kos pembinaan.

37. PR-1351-L00752

**Tuan Idris Bin Ahmad [ Bukit Gantang ]** minta **PERDANA MENTERI** menyatakan apakah rasional Kerajaan melaksanakan Projek Rangkaian Rel Pantai Timur (ECRL) daripada segi ekonomi, sosial dan adakah kajian kebolehlaksanaan telah dibuat menunjukkan ia baik kepada penduduk Pantai Timur.

38. PR-1351-L01229

**Tan Sri Dato' Haji Muhyiddin Bin Haji Mohd Yassin [ Pagoh ]** minta **PERDANA MENTERI** menyatakan langkah-langkah Kerajaan menyelesaikan masalah kos keseluruhan Hutang Peneroka Felda yang menyertai skim tanam semula yang amat tinggi, sedangkan bantuan yang diterima peneroka adalah tidak memadai. Adakah Kerajaan akan mengkaji semula faedah Bayaran Kembali (bayaran balik hutang) setinggi 6.25% yang masih dikekalkan sehingga kini.

39. PR-1351-L00346

**Tuan Tan Kok Wai [ Cheras ]** minta **PERDANA MENTERI** menyatakan adakah juga draf satu rang undang-undang untuk mengawal dana politik memasukkan fasal perisytiharan mandatori semua aset dan kekayaan yang dimiliki oleh semua wakil rakyat, pegawai-pegawai Kerajaan dan parti-parti politik, jika tidak, mengapa.

40. PR-1351-L00290

**Datuk Seri Haji Ahmad Bin Hamzah [ Jasin ]** minta **MENTERI PERDAGANGAN ANTARABANGSA DAN INDUSTRI** menyatakan impak Brexit dan Trumpnomics ke atas ekonomi Malaysia.



41. PR-1351-L00172  
**Dato' Sri Abdul Azeez Bin Abdul Rahim [ Baling ]** minta **MENTERI PELANCONGAN DAN KEBUDAYAAN** menyatakan adakah pihak Kementerian bercadang untuk memansuhkan khidmat pemandu pelancong bagi lawatan pelajar sekolah dalam negara. Ini disebabkan lawatan pelajar sekolah telah dirancang oleh guru pengiring dan memandangkan kos pemandu pelancong agak tinggi dan tidak berfungsi ketika lawatan pelajar sekolah, hal ini pastinya akan membebankan pihak sekolah dan pengusaha bas sekolah ketika musim cuti sekolah.
42. PR-1351-L00114  
**Tan Sri Datuk Seri Panglima Joseph Pairin Kitingan [ Keningau ]** minta **MENTERI PENDIDIKAN** menyatakan bilakah bangunan Sekolah Menengah Desa Wawasan Tambunan yang telah pun diluluskan dapat dilaksanakan.
43. PR-1351-L00378  
**Datin Mastura Binti Mohd Yazid [ Kuala Kangsar ]** minta **MENTERI KESIHATAN** menyatakan kesan yang akan dihadapi kepada pengeksport makanan negara ke Amerika Syarikat, apabila "US Food and Drug Administration" (FDA) mula menguatkuasakan "Foreign Supplier Verification Programme" (FSVP) mulai Mei 2017.
44. PR-1351-L01095  
**Tuan Tony Pua Kiam Wee [ Petaling Jaya Utara ]** minta **MENTERI KEWANGAN** menyatakan nilai dan terma-terma utama kontrak pembinaan East Coast Rail Link dengan syarikat China dan pinjaman Bank EXIM China untuk membiayai projek ini. Apakah sebabnya projek ini tidak di tender secara terbuka walaupun syarikat-syarikat tempatan mempunyai kepakaran yang mencukupi.
45. PR-1351-L00455  
**Dr. Tan Seng Giaw [ Kepong ]** minta **MENTERI PENGANGKUTAN** menyatakan keberkesanan untuk menyelenggara lapangan-lapangan terbang.
46. PR-1351-L01039  
**Tuan Er Teck Hwa [ Bakri ]** minta **MENTERI PENGANGKUTAN** menyatakan jumlah jenis nombor plat JPJ yang memohon tender telah didaftarkan atau tidak didaftarkan bagi setiap negeri dari tahun 2015 dan 2016.
47. PR-1351-L01264  
**Tuan Su Keong Siong [ Ipoh Timur ]** minta **PERDANA MENTERI** menyatakan sebab-sebab kenapa masih terdapat lebih daripada 4 juta pengundi layak yang belum berdaftar sebagai pengundi di Malaysia walaupun usaha-usaha telah dilaksanakan oleh pihak SPR . Sila nyatakan butiran secara terperinci jumlah bantahan ke atas kemasukan nama-nama orang di dalam Rang Daftar Pemilih Tambahan yang di terima oleh SPR untuk tempoh suku tahun ketiga dan keempat 2016.

48. PR-1351-L00280  
**Ir. Shaharuddin Bin Ismail [ Kangar ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah usaha-usaha yang diambil oleh Kerajaan dalam meningkatkan pengurusan sistem saliran dan perparitan khususnya di negeri Perlis dan adakah hasil kajian Jabatan Pengairan dan Saliran Malaysia mengenai sistem perparitan negara ini mempunyai pelan secara menyeluruh bagi mengelakkan berlakunya seperti banjir kilat di kawasan bandar.
49. PR-1351-L00755  
**Tuan Nik Mohamad Abduh Bin Nik Abdul Aziz [ Pasir Mas ]** minta **PERDANA MENTERI** menyatakan apakah perkembangan terkini tindakan Kerajaan bagi mengatasi masalah pertembungan industri teksi dan perkhidmatan GrabCar, Uber di negara ini.
50. PR-1351-L00933  
**Tuan Khalid Bin Abd. Samad [ Shah Alam ]** minta **PERDANA MENTERI** menyatakan tindakan Kerajaan ke arah menuntut kembali harta 1MDB yang telah dirampas dan disita seperti yang dilakukan Kerajaan Amerika Syarikat.
51. PR-1351-L00135  
**Tuan Anuar Bin Abd. Manap [ Sekijang ]** minta **PERDANA MENTERI** menyatakan sejauh manakah pembelian ladang PT Eagle High Plantation Tbk (EHP) Indonesia oleh Felda mampu memberi perkembangan positif kepada Felda dan apakah jangkaan unjuran prestasi Felda jika pembelian ini dimuktamadkan kelak.
52. PR-1351-L00450  
**Tuan N. Surendran A/L K Nagarajan [ Padang Serai ]** minta **MENTERI DALAM NEGERI** menyatakan mengapa Azri bin Mohamed (seorang tahanan reman yang meninggal dunia pada 14.9.2016 di penjara Pengkalan Chepa) mati disebabkan jangkitan 'shigella' walaupun ia adalah penyakit yang mudah dirawat dengan antibiotik.
53. PR-1351-L00330  
**Dr. Che Rosli Bin Che Mat [ Hulu Langat ]** minta **PERDANA MENTERI** menyatakan sambutan orang ramai kepada penggunaan Pengangkutan Awam MRT selepas dilancarkan oleh Perdana Menteri sewaktu diberi tambang percuma dan selepas dikenakan bayaran tambang sehingga akhir Februari lepas.
54. PR-1351-L00495  
**Tuan Wong Chen [ Kelana Jaya ]** minta **PERDANA MENTERI** menyatakan sama ada pihak Kementerian telah memberikan bantuan kepada pihak berkuasa negara Singapura, United Kingdom, Australia, Hong Kong, dan Switzerland mengenai siasatan negara-negara tersebut atas 1MDB. Sekiranya ada, perincian butir-butir bantuan ini.

55. PR-1351-L00656  
**Tan Sri Dato' Seri Abd Khalid Bin Ibrahim [ Bandar Tun Razak ]** minta **MENTERI PENGANGKUTAN** menyatakan dapatan sebarang kajian kos faedah bagi projek membina sebuah bandar pelabuhan dan industri di Pulau Carey yang dikatakan bernilai RM200 bilion demi memastikan limpahan ekonomi kepada Pelabuhan Klang dan kawasan sekitar di samping pulangan positif bagi masyarakat setempat.
56. PR-1351-L00723  
**Dato' Dr. Nik Mazlan Bin Nik Mohamad [ Pasir Puteh ]** minta **MENTERI PERTANIAN DAN INDUSTRI ASAS TANI** menyatakan pencapaian hasil tanaman padi dan pengurusan bekalan air ke jelapang padi di kawasan KADA Kelantan, bagaimanakah kedudukan pembinaan empangan rendah terkini di negeri Kelantan.
57. PR-1351-L01302  
**Dato' Abdullah Sani Bin Abdul Hamid [ Kuala Langat ]** minta **MENTERI SUMBER MANUSIA** menyatakan kedudukan TTPA dalam isu pekerja setelah Amerika Syarikat menarik diri dari menganggotai badan tersebut.
58. PR-1351-L00363  
**Datuk Aaron Ago Anak Dagang [ Kanowit ]** minta **PERDANA MENTERI** menyatakan status pelaksanaan program pinjaman perumahan untuk penduduk rumah panjang di Sarawak yang telah diperuntukkan sebanyak RM 50 juta dalam Bajet 2016.
59. PR-1351-L00257  
**Tuan Sim Tong Him [ Kota Melaka ]** minta **MENTERI PERTAHANAN** menyatakan :-
- (a) tentang kedudukan perhubungan di antara negara Malaysia dengan negara China dalam sektor pertahanan dan sektor industri dan nyatakan jenis persetujuan yang telah dicapai oleh kedua-dua negara dalam mempertahankan keamanan rantau ini; dan
  - (b) senaraikan industri-industri yang telah diceburi oleh negara China kebelakangan ini.
60. PR-1351-L00954  
**Dr. Hajah Siti Mariah Binti Mahmud [ Kota Raja ]** minta **MENTERI DALAM NEGERI** menyatakan jumlah pekerja dari negara China yang berada di Malaysia dan projek masa depan.

61. PR-1351-L00896  
**Tuan Haji Nasrudin Bin Hassan [ Temerloh ]** minta **PERDANA MENTERI** menyatakan apakah Kementerian melaksanakan penelitian yang mendalam dalam pemberian kontrak konsesi bagi pembinaan ECRL termasuk melibatkan prestasi syarikat yang diberikan tender pembinaan.
62. PR-1351-L01363  
**Tuan Oscar Ling Chai Yew [ Sibu ]** minta **MENTERI KEWANGAN** menyatakan tindakan yang akan diambil oleh Kerajaan apabila harga runcit minyak mencatat RM3 seliter. Adakah Kerajaan mempunyai rancangan untuk memulakan subsidi minyak.
63. PR-1351-L00986  
**Dato' Haji Mahfuz Bin Haji Omar [ Pokok Sena ]** minta **MENTERI PENGANGKUTAN** menyatakan bagaimana perkiraan pembayaran yang dipersetujui antara Kerajaan dengan Lembaga Tabung Angkatan Tentera berkaitan pengendalian Sistem Penguatkuasaan Automatik (AES).
64. PR-1351-L01143  
**Tuan Ahmad Marzuk Bin Shaary [ Bachok ]** minta **PERDANA MENTERI** menyatakan usaha Suruhanjaya Pencegahan Rasuah Malaysia (SPRM) dalam memerangi rasuah pilihan raya dan mencegah pembelian undi dalam menghadapi Pilihan Raya Umum ke-14.
65. PR-1351-L00241  
**Tuan William Leong Jee Keen [ Selayang ]** minta **MENTERI DALAM NEGERI** menyatakan sama ada dan langkah yang dicadangkan untuk menyelesaikan masalah kewarganegaraan bagi anak-anak kelahiran tempatan tanpa dokumentasi atau oleh ibu warganegara asing supaya mereka boleh memperolehi kewarganegaraan.
66. PR-1351-L00706  
**Tuan Gobind Singh Deo [ Puchong ]** minta **MENTERI DALAM NEGERI** menyatakan bilangan orang yang telah mati dalam tahanan polis sejak 2010 (dari tahun ke tahun) dan menyatakan apakah langkah-langkah yang diambil oleh pihak polis untuk memastikan keselamatan tahanan-tahanan yang berada dalam tahanan polis.
67. PR-1351-L00014  
**Dato' Seri Haji Ahmad Husni Bin Mohamad Hanadzlah [ Tambun ]** minta **MENTERI PERTANIAN DAN INDUSTRI ASAS TANI** menyatakan program-program pertanian moden yang telah dilaksanakan dan jumlah Bajet 2017 diperuntukkan untuk pemodenan industri pertanian.

68. PR-1351-L01133

**Dato' Haji Ahmad Nazlan Bin Idris [ Jerantut ]** minta **MENTERI PENDIDIKAN** menyatakan adakah pihak Kementerian bercadang untuk mengkaji kemudahan prasarana, peralatan dan perabot disekolah yang sering dilanda banjir supaya ianya lebih mudah dipindahkan dan kalis air agar proses pembelajaran tidak terganggu akibat kemusnahan banjir.

**PADA PERMULAAN URUSAN MESYUARAT**  
**MENGEMUKAKAN RANG UNDANG-UNDANG KERAJAAN**  
**UNTUK BACAAN KALI YANG PERTAMA**

**1. Menteri Kewangan**

- \* Rang Undang-Undang Perbekalan Tambahan (2016) 2017

**2. Menteri di Jabatan Perdana Menteri**

- \* Rang Undang-Undang Saraan Hakim (Pindaan) 2017

---

\* Menandakan bahawa Rang Undang-undang ini akan dibawa pada semua peringkat di mesyuarat ini.

### **ATURAN URUSAN MESYUARAT DAN USUL-USUL**

1. **Usul dibuat oleh Yang Berhormat Datuk Liang Teck Meng [ Simpang Renggam ] dan masalah dicadangkan :-**

“ Bahawa suatu ucapan yang tidak sepatutnya dipersembahkan kepada Seri Paduka Baginda Yang di-Pertuan Agong, demikian bunyinya:-

“ Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbanyak-banyak syukur dan menjunjung kasih kerana Titah Ucapan Seri Paduka Baginda semasa membuka Penggal Kelima, Parlimen Yang Ketiga Belas.”

**Menyambung semula Perbahasan atas masalah (20 Mac, 2017)**

- |    |                |   |                                   |
|----|----------------|---|-----------------------------------|
| 2. | (D.R. 13/2016) | Rang Undang-undang Mahkamah<br>(Kaedah-Kaedah Pemulaan Tindakan Sivil)<br>2016                | <b>Bacaan Kali<br/>Yang Kedua</b> |
|    |                | <b>[ Menteri di Jabatan Perdana Menteri ]</b>   |                                   |
| 3. | (D.R. 21/2016) | Rang Undang-undang Kebankrapan<br>(Pindaan) 2016  | “                                 |
|    |                | <b>[ Menteri di Jabatan Perdana Menteri ]</b>   |                                   |
| 4. | (D.R. 20/2016) | Rang Undang-undang Membaharui<br>Undang-undang (Perkahwinan dan<br>Perceraian) (Pindaan) 2016 | “                                 |
|    |                | <b>[ Menteri di Jabatan Perdana Menteri ]</b>   |                                   |
| 5. | (D.R. 25/2016) | Rang Undang-undang Setem (Pindaan)<br>2016.   | “                                 |
|    |                | <b>[ Menteri Kewangan ]</b>   |                                   |
| 6. | (D.R. 1/2017)  | Rang Undang-Undang Timbang dan Sukat<br>(Pindaan) 2017  | “                                 |
|    |                | <b>[ Menteri Perdagangan Dalam Negeri,<br/>Koperasi dan Kepenggunaan ]</b>                    |                                   |

7. (D.R. 3/2017) Rang Undang-Undang Perdagangan **Bacaan Kali Strategik (Pindaan) 2017 Yang Kedua**

**[ Menteri Perdagangan Antarabangsa Dan Industri ]**

8. (D.R. 2/2017) Rang Undang-Undang Institusi Pendidikan Tinggi Swasta (Pindaan) 2017 “

**[ Menteri Pendidikan Tinggi ]**

9. **Dato’ Seri Abdul Hadi bin Awang [ Marang ] akan mencadangkan:-**

“Bahawa Dewan ini memberikan kebenaran menurut Peraturan Mesyuarat 49 (1) kepada Yang Berhormat Ahli bagi kawasan Marang untuk mencadangkan suatu Rang Undang-undang Ahli Persendirian bernama Rang Undang-undang Mahkamah Syariah (Bidang Kuasa Jenayah) (Pindaan) 2016 seperti berikut:-

**Pindaan Seksyen 2**

Akta Mahkamah Syariah (Bidang Kuasa Jenayah) 1965 [ Akta 355 ] dipinda dalam proviso kepada seksyen 2 dengan menggantikan perkataan “***penjara selama tempoh melebihi tiga tahun atau denda melebihi lima ribu ringgit atau sebatan melebihi enam kali*** “ dengan perkataan “***penjara selama tempoh melebihi tiga puluh tahun atau denda melebihi satu ratus ribu ringgit atau sebatan satu ratus kali sebagaimana ditadbir selaras dengan tatacara jenayah Syariah***”.

**[ Menteri di Jabatan Perdana Menteri ]**

10. R-1351-U(27)002  
**Dr. Tan Seng Giaw [ Kepong ] akan mencadangkan :-**

Bahawa Dewan ini membahaskan masalah akibat penarikan Amerika Syarikat daripada TPPA.

**[ Menteri Perdagangan Antarabangsa Dan Industri ]**

11. PR-1351-U(27)003  
**Datuk Dr. Makin @ Marcus Mojigoh [ Putatan ] akan mencadangkan :-**  
“Bahawa Dewan ini mengambil maklum bahawa, pertumbuhan penduduk di daerah Putatan adalah begitu mendadak sekali dan ditokok tambah dengan pembangunan infrastruktur yang rancak seiring dengan statusnya sebagai satu daripada daerah yang rancak membangun di negeri Sabah khasnya.

Dan mengambil maklum juga bahawa, dewasa ini, isu masalah sosial, keselamatan sosial serta ketenteraman sosial menjadi topik bualan harian di kalangan warga Putatan. Setiap hari ketiga-tiga topik ini akan kedengaran malah menjadi kegusaran bagi warga Putatan kerana kehadiran anggota keselamatan yang amat kurang disebabkan cadangan pewujudan dan pembinaan ibu pejabat polis daerah Putatan telah lama tertangguh.



Dan mengambil maklum juga bahawa ketika ini, isu masalah sosial, keselamatan sosial serta ketenteraman sosial di Putatan adalah di bawah pentadbiran Ibu Pejabat Polis Daerah Penampang serta sebahagiannya di bawah pentadbiran Ibu Pejabat Polis Daerah Kota Kinabalu.

Mengambil maklum juga bahawa untuk menangani masalah sosial, keselamatan sosial serta ketenteraman sosial di daerah Putatan, hanya sebuah balai polis yang dianggotai kurang daripada 22 anggota dengan kelengkapan yang serba kekurangan, terpaksa berhempas pulas untuk menjaga daerah Putatan dengan keluasan 30km persegi dan berkepadatan penduduk melebihi 100 ribu orang.

Dan mengambil maklum juga bahawa, apabila berlakunya sesuatu jenayah atau kecemasan, ada kalanya ketibaan anggota keselamatan itu agak lewat kerana jarak tempat kejadian dengan IPD Penampang atau IPD Kota Kinabalu agak jauh dan mengambil masa untuk tiba.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan haruslah dengan segera meluluskan penubuhan dan pembinaan IPD Putatan lengkap dengan perjawatannya".

**[ Menteri Dalam Negeri ]**

12. PR-1351-U(27)004

**Datuk Dr. Makin @ Marcus Mojigoh [ Putatan ]** akan mencadangkan :-

"Bahawa Dewan ini mengambil maklum bahawa Perkara 11 Perlembagaan Persekutuan Malaysia memberikan semua rakyatnya kebebasan beragama.

Dan mengambil maklum juga bahawa Perkara 8 Perlembagaan Persekutuan Malaysia menjamin kesamarataan hak untuk warganya bagi menjalani kehidupan harian mereka.

Dan mengambil maklum juga bahawa, Malaysia sebagai negara peneraju gerakan kesederhanaan global di bawah pimpinan YAB. Perdana Menteri, telah berjaya memahat nama di persada antarabangsa di mana Malaysia menjadi model penerimaan kepelbagaian agama dan kaum sebagai sumber kekuatannya.

Dan mengambil maklum juga bahawa, konsep penerimaan kepelbagaian agama dan bangsa melalui Gagasan 1Malaysia adalah model yang terbaik dalam mewujudkan keharmonian, kemakmuran dan perpaduan di negara ini.

Dan mengambil maklum juga bahawa Kerajaan pimpinan YAB. Perdana Menteri berjanji melalui manifesto Barisan Nasional pada PRU ke-13, untuk menyediakan lebih banyak bantuan kewangan kepada institusi-institusi agama berdaftar dan rumah-rumah ibadat.

Dan mengambil maklum dan contoh, bahawa Kerajaan Negeri Sabah dan Sarawak juga telah menyediakan dana khas dalam bajet tahunan mereka bagi maksud bantuan kewangan kepada institusi-institusi agama berdaftar dan rumah-rumah ibadat di negeri Sabah dan Sarawak.

Maka, bagi memenuhi aspirasi di atas dan rakyat bukan Islam khususnya, Dewan yang mulia ini hendaklah mengambil ketetapan bahawa Kerajaan Malaysia hendaklah menyediakan satu jumlah khas (dana) dalam bajet tahunan negara, bagi aktiviti institusi-institusi agama berdaftar dan rumah-rumah ibadat (bukan Islam)."

**[ Perdana Menteri ]**

13. PR-1351-U(27)005

**Datuk Dr. Makin @ Marcus Mojigoh [ Putatan ]** akan mencadangkan :-  
"Bahawa Dewan ini mengambil maklum bahawa, Orang Asli yang terdiri daripada suku Semang (Negrito), Senoi dan Proto Malay adalah Orang Asli yang tinggal di Semenanjung Malaysia dan juga merupakan penghuni tertua di Semenanjung Malaysia.

Dan mengambil maklum juga bahawa, walaupun Orang Asli adalah merupakan penduduk asli Semenanjung Malaysia dan disebut sebagai "Bumiputera", namun mereka tidak menikmati keistimewaan yang diberikan kepada kaum Melayu dan Bumiputera negeri Sabah dan Sarawak di mana mereka tidak diiktiraf sebagai Bumiputera di bawah Perkara 153 Perlembagaan Persekutuan Malaysia.

Dan mengambil maklum juga bahawa, walaupun Jabatan Hal Ehwal Orang Asli (JHEOA) telah ditubuhkan pada tahun 1954 dan pindaan ke atas beberapa akta, seperti Akta Orang Asli 1954 telah dibuat bagi membolehkan dan meningkatkan sosio budaya dan ekonomi Orang Asli, namun kedudukan mereka tidak banyak berubah disebabkan status kedudukan mereka dalam Perlembagaan negara adalah kurang jelas.

Dan mengambil maklum juga bahawa, sesuai dengan konsep 1Malaysia yang diterajui oleh YAB. Perdana Menteri, kedudukan Orang Asli di negara ini hendaklah diterima semua dan diberikan hak dan layanan sama rata.

Dan mengambil maklum juga bahawa Perkara 8 Perlembagaan Persekutuan Malaysia menjamin kesamarataan hak untuk warganya bagi menjalani kehidupan harian mereka, termasuklah kaum Orang Asli.

Maka, bagi menangani kepincangan ini, Dewan ini hendaklah mengambil ketetapan bahawa, Perkara 153 Perlembagaan Persekutuan Malaysia serta perkara-perkara yang berkaitan, hendaklah dipinda bagi membolehkan Orang Asli dikategorikan sebagai Bumiputera dan diberikan hak Bumiputera, seiringan dengan orang-orang Melayu dan kaum Bumiputera Sabah dan Sarawak."

**[ Perdana Menteri ]**

14. PR-1351-U(27)006

**Datuk Dr. Makin @ Marcus Mojigoh [ Putatan ]** akan mencadangkan :-

“Bahawa Dewan ini mengambil maklum bahawa, masalah setinggan di bandar adalah masalah yang saban hari makin meningkat kerana migrasi dari luar bandar ke bandar, terutama sekali untuk tujuan mencari pekerjaan.

Dewan ini hendaklah juga mengambil maklum bahawa migran ekonomi yang berpindah daripada luar bandar ke bandar ini adalah dari golongan yang kurang berkemampuan/berpendapatan rendah dan mereka tidak mampu untuk membeli atau memiliki rumah-rumah yang dibina oleh pihak pemaju atau PR1MA yang ada pada ketika ini, di mana kebanyakan mereka ini hanya mampu untuk membayar kadar sewaan di bawah RM350 sebulan.

Dan mengambil maklum juga bahawa, matlamat Kerajaan mensasarkan sifar setinggan terutama sekali di kawasan bandar adalah agak sukar untuk dicapai selagi masalah perumahan bagi migran yang dimaksudkan di atas tidak ditangani secara tuntas.

Dan mengambil maklum juga bahawa, Program Perumahan Rakyat (PPR) yang dahulunya untuk sewaan tanpa had masa dilihat sebagai satu langkah alternatif bagi mengatasi masalah setinggan di bandar dan sekali gus memberikan kumpulan sasar untuk menduduki rumah yang agak selesa. Tetapi malangnya, status PPR tersebut telah dipinda kepada status rumah transit untuk pendudukan untuk tempoh tidak melebihi lima (5) tahun.

Dan mengambil maklum juga bahawa Program Perumahan Rakyat atau PPR yang ada sekarang ini merupakan sumber alternatif bagi mengatasi masalah setinggan di bandar di mana rumah-rumah PPR ini diubah syarat daripada sewaan kepada sewa beli bagi membolehkan mereka yang dimaksudkan di atas untuk akhirnya memiliki rumah mereka sendiri.

Maka, bagi menangani masalah setinggan bandar dan kekurangan perumahan untuk golongan kurang mampu, Dewan ini hendaklah mengambil ketetapan bahawa Kerajaan hendaklah meminda syarat pendudukan rumah PPR di seluruh negara daripada bulanan kepada syarat sewa-beli.”

**[ Menteri Kesejahteraan Bandar, Perumahan Dan Kerajaan Tempatan ]**

15. PR-1351-U(27)007

**Datuk Dr. Makin @ Marcus Mojigoh [ Putatan ]** akan mencadangkan :-

“Bahawa Dewan ini mengambil maklum bahawa Chinese Independent School di Malaysia menjalankan taksiran peperiksaan persekolahan mereka melalui sijil yang dikenali sebagai Unified Examination Certificate (UEC) yang mana dibahagikan kepada tiga peringkat iaitu Unified Examination Certificate - Junior Middle (UEC-JML), Unified Examination Certificate Vocational (UEC-V) dan Unified Examination Certificate Senior Middle (UEC-SML).

Dan mengambil maklum juga bahawa, persijilan UEC telah pun diguna pakai dalam persekolahan oleh United Chinese School Committees Association of Malaysia sejak ianya diperkenalkan pada tahun 1975.

Dan mengambil maklum juga bahawa sijil UEC yang diperkenalkan oleh UCSCAM ini telah diiktiraf oleh universiti di serata negara seperti di United Kingdom, Amerika Syarikat, Taiwan, Hong Kong, China, Australia, Kanada, Singapura dan lain-lain negara.

Dan mengambil maklum juga bahawa malangnya, Kementerian Pendidikan dan Kementerian Pendidikan Tinggi Malaysia atau secara khususnya, Lembaga Akreditasi Negara tidak mengiktiraf sijil UEC ini terutama sekali bagi kemasukan ke universiti awam Malaysia, walau pun National University of Singapore yang berkedudukan tempat keempat universiti terbaik di dunia mengiktiraf sijil UEC ini.

Dan mengambil maklum juga bahawa dengan ketiadaan pengiktirafan yang dimaksudkan di atas, negara Malaysia secara tidak langsung mengalami kerugian yang besar di mana pemegang sijil UEC ini terpaksa meneruskan pendidikan tinggi mereka di luar negara di mana aliran wang keluar daripada negara ini dan juga kecenderungan lepasan sijil UEC ini untuk terus bekerja di luar negara adalah tinggi, di mana dalam hal ini negara Malaysia akan kerugian "aliran keluar" tenaga mahir ke luar negara.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan haruslah dengan segera mengiktiraf Sijil Unified Examination Certificate bagi manfaat negara."

#### **[ Menteri Pendidikan ]**

16. PR-1351-U(27)008

**Datuk Dr. Makin @ Marcus Mojigoh [ Putatan ]** akan mencadangkan :-  
"Bahawa Dewan ini mengambil maklum bahawa kesan pemanasan global dan perubahan cuaca kini menjadi topik perbualan harian di seluruh pelosok dunia di mana ianya bukan lagi satu fenomena tetapi telah menjadi realiti yang mana setiap warga dunia mempunyai tanggungjawab untuk sama-sama melaksanakan langkah-langkah mitigasi bagi mengurangkan impaknya ke atas kehidupan manusia.

Dan mengambil maklum juga bahawa salah satu penyebab utama kedua-dua masalah di atas adalah akibat daripada kesan penebangan pokok-pokok disebabkan aktiviti ekonomi seperti pembukaan ladang dan sebagainya.

Dan mengambil maklum juga bahawa pihak berkuasa tempatan berperanan untuk mengambil bahagian dalam usaha untuk langkah mitigasi bagi mengatasi kedua-dua masalah di atas walaupun dalam bentuk kecil, dengan menanam lebih banyak pokok-pokok di seluruh kawasan seliaan mereka.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah meminta pihak berkuasa tempatan untuk segera menanam lebih banyak pokok-pokok di kawasan di bawah seliaan mereka di samping memperbanyakkan kempen menanam pokok untuk menyemai budaya menanam pokok di kalangan rakyat setempat.”

**[ Menteri Sumber Asli Dan Alam Sekitar ]**

17. PR-1351-U(27)009

**Datuk Dr. Makin @ Marcus Mojigoh [ Putatan ]** akan mencadangkan :-  
 “Bahawa Dewan ini mengambil maklum bahawa, bagi kawasan Dewan Undangan Negeri N.18 Petagas (Parlimen P.173 Putatan), hanya terdapat sebuah sekolah menengah sahaja iaitu Sekolah Menengah Kerajaan (SMK) Tansau, Putatan untuk menampung murid-murid keluaran lima (5) buah sekolah rendah yang terletak di kawasan yang sama.

Dan mengambil maklum juga bahawa, kerana kekurangan tempat di sekolah menengah, ramai murid daripada kawasan Dewan Undangan Negeri N.18 Petagas terpaksa meneruskan persekolahan menengah mereka di sekolah menengah di kawasan Dewan Undangan Negeri N.16 Luyang, N.17 Tanjong' Aru, N.19 Kapayan dan N.20 Moyog, di mana sekali gus meningkatkan kos persekolahan mereka daripada segi kos pengangkutan dan menyebabkan ketidakselesaan hidup rakyat.

Dan mengambil maklum juga bahawa cadangan pembinaan Sekolah Menengah Kerajaan (SMK) Petagas telah pun dirancang sejak Rancangan Malaysia Ke-Sembilan (RMK9) lagi dan disenaraikan semula dalam Rancangan Malaysia Ke-Sebelas (RMK11), namun sehingga kini belum terdapat sebarang keputusan tetap bagi permasalahan ini walau pun tapak bagi Sekolah Menengah Petagas serta infrastruktur asas seperti jalan raya telah pun tersedia.

Maka, bagi menangani masalah ini dan mendahulukan rakyat, Dewan yang mulia ini hendaklah mengambil ketetapan bahawa Sekolah Menengah Kerajaan (SMK) Petagas hendaklah dibina dan disiapkan dalam tempoh terdekat seperti yang telah dirancang terdahulu.”

**[ Menteri Pendidikan ]**

18. PR-1351-U(27)010

**Dato' Kamarudin Bin Jaffar [ Tumpat ]** akan mencadangkan :-

“Bahawa Dewan ini mengambil maklum akan cadangan untuk pembangunan semula kawasan Rumah Pangsa Sri Labuan dan pembangunan semula Zon 1 yang melibatkan Rumah Pangsa Sri Melaka, Sri Johor, Ikan Emas dan Sri Pulau Pinang di dalam kawasan Parlimen Bandar Tun Razak.

Dewan ini juga mengambil maklum kegelisahan majoriti penghuni di perumahan-perumahan yang terlibat akan masa depan mereka akibat daripada cadangan ini.

Maka Dewan ini mengambil kira suasana ini dan memutuskan bahawa segala cadangan pembangunan semula oleh Kementerian Wilayah Persekutuan di kawasan tersebut hendaklah mengambil kira perkara-perkara berikut:

- i. Mengadakan perbincangan dengan semua penghuni, iaitu pemilik dan penyewa selain daripada wakil-wakil blok dan persatuan-persatuan mereka;
- ii. Pihak DBKL mestilah dilibatkan dalam semua perbincangan dan keputusan, selain daripada pihak Kementerian;
- iii. Pemilihan pemaju mestilah ditentukan secara tender terbuka supaya penghuni dan pembeli mendapat tawaran terbaik; dan
- iv. Semua aspek pembangunan mestilah memberikan keselesaan kepada penghuni dengan mengambil kira ciri-ciri berikut:
  - a. .Kepadatan setiap blok,
  - b. .Keluasan unit
  - c. .Kualiti pembinaan lif dan bahan binaan,
  - d. .Kemampuan membayar yuran penyelenggaraan oleh pemilik selepas

**[ Menteri Wilayah Persekutuan ]**

19. PR-1351-U(27)011

**Dato' Kamarudin Bin Jaffar [ Tumpat ]** akan mencadangkan :-

“Bahawa Dewan ini mengambil maklum dengan penuh kebimbangan akan pergolakan politik antarabangsa mutakhir ini yang mempamerkan satu suasana ketidakstabilan hubungan antarabangsa yang amat kritikal. Dewan juga memerhatikan dengan penuh kerisauan lagak politik Amerika Syarikat di bawah Presiden Trump, politik Eropah ekoran keputusan Brexit oleh Britain, politik Russia oleh Presiden Putin yang antara lain telah mengakibatkan Ukraine diceroboh dan penembakan pesawat MH17, dan lebih dekat lagi, politik Republik Rakyat China yang menuntut sebahagian Lautan China Selatan sebagai wilayahnya.

Maka, sebagai satu langkah peringkat negara dan serantau untuk menghadapi krisis ini, Dewan ini memutuskan untuk mempertegaskan dan menggerakkan semula dengan sungguh-sungguh dasar Asia Tenggara sebagai satu rantau yang aman, bebas dan berkecuali atau ZOPFAN yang telah dipersetujui dan dimeterai pada 27 November 1971 oleh Malaysia, Indonesia, Filipina, Thailand dan Singapura.”

**[ Menteri Luar Negeri ]**

20. PR-1351-U(27)012

**Tuan Nga Kor Ming [ Taiping ]** akan mencadangkan :-

“Bahawa Dewan yang mulia ini meluluskan satu ketetapan supaya Laporan Ketua Audit Negara berkenaan dengan isu 1MDB (1Malaysia Development Bhd) di bentang dan dikemukakan untuk perbahasan di Dewan Rakyat dengan kadar segera.”

**[ Perdana Menteri ]**

21. PR-1351-U(27)013

**Tuan Nga Kor Ming [ Taiping ]** akan mencadangkan :-

“Bahawa Dewan yang mulia ini meluluskan satu ketetapan supaya YAB. Perdana Menteri dan seluruh anggota Menteri Kabinet mengisytiharkan harta dan aset mereka kepada Dewan Rakyat tiap-tiap tahun pada bulan Disember”.

**[ Perdana Menteri ]**

22. PR-1351-U(27)014

**Tuan Nga Kor Ming [ Taiping ]** akan mencadangkan :-

“Bahawa Dewan yang mulia ini meluluskan satu ketetapan supaya mengesyorkan kepada KBDYMM Seri Paduka Baginda Yang Dipertuan Agong untuk menubuhkan satu Suruhanjaya Diraja supaya menyiasat dan mengemukakan laporan siasatan terhadap skandal kewangan 1MDB dengan kadar segera.”

**[ Perdana Menteri ]**

23. PR-1351-U(27)015

**Tuan Nga Kor Ming [ Taiping ]** akan mencadangkan :-

“Bahawa Dewan yang mulia ini meluluskan satu ketetapan selaras dengan titah Majlis Raja-Raja Melayu di mana Akta Majlis Keselamatan Negara 2016 di bentang dan dikaji semula di Dewan Rakyat dengan kadar segera.”

**[ Perdana Menteri ]**

24. PR-1351-U(27)016

**Tuan Nga Kor Ming [ Taiping ]** akan mencadangkan :-

“Bahawa Dewan yang mulia ini meluluskan satu ketetapan supaya Sijil Peperiksaan Unified Examination Certificate (UEC) yang telah mendapat pengiktirafan antarabangsa diberi pengiktirafan penuh oleh Kerajaan Malaysia.”

**[ Menteri Pendidikan ]**

25. PR-1351-U(27)017

**Tuan Nga Kor Ming [ Taiping ]** akan mencadangkan :-

“Bahawa Dewan yang mulia ini meluluskan satu ketetapan secara sebulat suara selaras dengan semangat Perlembagaan Persekutuan tahun 1957 dan prinsip "one man, one vote", mana-mana persempadanan semula kawasan pilihan raya jumlah bilangan pengundinya tidak boleh melebihi perbezaan 15% di antara semua kawasan pilihan raya di negara ini.”

**[ Perdana Menteri ]**

26. PR-1351-U(27)018

**Tuan M. Kula Segaran A/L V. Murugeson [ Ipoh Barat ]** akan mencadangkan :-

“Bahawa Dewan ini mengambil maklum penubuhan entiti persendirian yang dikenali sebagai MyEG menduakan kerja Kementerian Dalam Negeri. MyEG sebagai satu agensi di antara Kementerian Dalam negeri dan orang awam adalah tidak diperlukan, membazirkan sumber-sumber dan mengenakan fi yang tidak berpatutan kepada orang awam. Penubuhan entiti ini mempersoal integriti Kerajaan dan menggalakkan amalan korupsi.”

**[ Menteri Dalam Negeri ]**

27. PR-1351-U(27)019

**Tuan Liew Chin Tong [ Kluang ]** akan mencadangkan :-

“Bahawa Dewan ini menggesa Kerajaan untuk mengumumkan laporan penuh Jawatankuasa Siasatan Bebas mengenai kejadian kebakaran Hospital Sultanah Aminah Johor Bahru pada 25 Oktober 2016 untuk makluman dan pengetahuan rakyat tentang punca-punca berlakunya kebakaran tersebut. Kerajaan juga didesak untuk menyatakan langkah-langkah yang akan diambil untuk mencegah dan mengelakkan tragedi kebakaran berulang lagi di mana-mana hospital atau pusat perubatan.”

**[ Menteri Kesihatan ]**

28. PR-1351-U(27)020

**Tuan Liew Chin Tong [ Kluang ]** akan mencadangkan :-

“Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi RM100 juta oleh Kementerian Pertahanan, mesti dibawa ke Parlimen di bahas dan diaudit oleh Jabatan Audit Negara supaya untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Kapal Selam Scorpene telah menimbulkan banyak persepsi negatif terhadap negara”.

**[ Perdana Menteri ]**



29. PR-1351-U(27)021

**Tuan Liew Chin Tong [ Kluang ]** akan mencadangkan :-

“Bahawa Dewan ini bersetuju mengurangkan peruntukan untuk JPM dan menyalurkan kepada peruntukan bagi hal ehwal pendidikan, pengangkutan awam, kesihatan dan kebajikan rakyat. Peruntukan untuk Jabatan Perdana Menteri telah dihadkan tahapnya pada tahun 2008 iaitu masing-masing sebanyak RM3.4 bilion bagi peruntukan pengurusan dan RM3.5 bilion untuk pembangunan. Ini membawa kepada jumlah keseluruhan sebanyak RM6.9 bilion. Berbanding 2017,

anggaran peruntukan pengurusan dan pembangunan telah melepasi tahap ditetapkan pada 2008 tersebut iaitu masing-masing sebanyak RM4.92 bilion dan RM11.019 bilion yang membawa kepada jumlah keseluruhan RM15.94 bilion”.

**[ Menteri Kewangan ]**

30. PR-1351-U(27)022

**Tuan Hee Loy Sian [ Petaling Jaya Selatan ]** akan mencadangkan :-

“Dewan ini mengambil maklum bahawa Bajet 2016 sebanyak RM50 juta yang diperuntukkan kepada SJK (C) tidak disalurkan pada tahun yang ditetapkan. Dewan yang mulia ini hendaklah mengambil ketetapan bahawa semua peruntukan bajet yang diluluskan di Parlimen haruslah disalurkan kepada pihak yang sewajarnya pada tahun yang berkenaan juga”.

**[ Menteri Kewangan ]**

31. PR-1351-U(27)023

**Tuan Hee Loy Sian [ Petaling Jaya Selatan ]** akan mencadangkan :-

“Dewan ini mengambil maklum bahawa banyak pengusaha teksi persendirian mahu pun berdaftar di bawah syarikat swasta menghadapi kesukaran dan ada yang terpaksa menutup operasi mereka.

Dewan ini juga mengambil maklum bahawa salah satu punca permasalahan ini adalah dengan kewujudan Uber dan GrabCar yang jauh lebih efisien daripada operasian mereka melalui penggunaan teknologi aplikasi dengan menggunakan telefon pintar. Maka dengan menyedari hakikat ini, Dewan yang mulia ini hendaklah membahaskan langkah-langkah strategik bagi menyelamatkan pengusaha teksi yang ada dalam menghadapi persaingan daripada Uber dan GrabCar ini”.

**[ Perdana Menteri ]**

32. PR-1351-U(27)024

**Tuan Hee Loy Sian [ Petaling Jaya Selatan ]** akan mencadangkan :-

“Bahawa Dewan ini menolak pembinaan jana kuasa tenaga nuklear di Malaysia yang akan memudaratkan alam sekitar sekiranya berlaku kecuaian dan bencana. Dewan ini juga haruslah membuat ketetapan bahawa sekiranya ia ingin tetap diteruskan harus mendapat referendum sokongan daripada rakyat”.

**[ Perdana Menteri ]**

33. PR-1351-U(27)025

**Dato' Johari Bin Abdul [ Sungai Petani ]** akan mencadangkan :-

“Bahawa Dewan ini mengambil maklum bahawa, lebih dari 200 ribu pelajar-pelajar setiap tahun akan menduduki peperiksaan SPM. Ada yang berjaya melanjutkan pelajaran ke tahap yang lebih tinggi dan ada yang gagal. Di sinilah jurang pemikiran akan berlaku. Yang berjaya mara terus dalam pelajaran akan mendapat pendedahan yang baik dan akan menjadi warga dan anak bangsa yang berguna kepada masyarakat. Tetapi yang gagal akan teraba-raba dan menanggung risiko terbabas dari landasan yang diharapkan.

Adalah dicadangkan semua pelajar lelaki lepasan SPM dimasukkan ke dalam Program Khas Khidmat Negara / National Service selama dua tahun. Enam bulan pertama dilatih dari segi fizikal dan mental serta ilmu kewarganegaraan. Selebihnya setahun setengah lagi mereka ditempatkan dalam Angkatan Tentera Malaysia atau PDRM. Sebaik sahaja mereka tamat menjalani penempatan di ATM atau PDRM mereka hendaklah digalakkan meneruskan pelajaran sama ada jurusan akademik atau vokasional mengikut kelayakan mereka. Dengan cara ini masalah remaja dapat dikurangkan walaupun tidak diselesaikan. Banyak negara-negara lain telah melaksanakan program ini dengan jayanya”.

**[ Menteri Pertahanan ]**

34. PR-1351-U(27)026

**Dato' Johari Bin Abdul [ Sungai Petani ]** akan mencadangkan :-

“Bahawa Dewan ini mengambil maklum bahawa, semangat kekitaan dan berpasukan hendaklah ditanam dalam jiwa setiap pelajar sekolah. Setiap pelajar di sekolah rendah atau menengah hendaklah diwajibkan menyertai satu pasukan beruniform dan mereka hendaklah mendapat didikan dari guru-guru yang terlatih dalam bidang-bidang tertentu yang berhubung dengan pasukan tersebut. Sehari dalam seminggu sekolah hendaklah memperuntukkan agar guru-guru dan pelajar-pelajar memakai uniform pasukan masing-masing ke sekolah. Dengan itu pelajar-pelajar akan merasa bangga dengan pasukan mereka dan ini akan membina semangat kekitaan di kalangan pelajar-pelajar dan guru-guru”.

**[ Menteri Pendidikan ]**

35. PR-1351-U(27)027

**Dato' Johari Bin Abdul [ Sungai Petani ]** akan mencadangkan :-

“Bahawa Dewan ini mengambil maklum bahawa, ramai ibu bapa mengeluh kos menghantar anak-anak ke sekolah makin meningkat mahal. Ini termasuk kos belanja makan harian anak-anak di sekolah. Oleh kerana kos juga pengusaha kantin akan menyediakan makanan yang kurang kualiti dan tidak berzat, malah ada yang membahayakan termasuk menggunakan perisa tiruan dan pemanis yang dilarang oleh Kementerian.

Satu kempen "membawa makanan dari rumah" yang melibatkan banyak Kementerian dan Jabatan hendaklah dimulakan. Jika makanan dibawa dari rumah sudah pasti ianya bersih, berzat dan jauh dari keracunan. Pelajar juga mesti digalakkan membawa air masak putih dari rumah dan dengan ini akan mengelakkan mereka dari meminum air bergas dan air manis yang merosakkan kesihatan pelajar-pelajar. Tindakan membawa makanan dari rumah bukan sahaja memastikan kesihatan terjamin juga mengurangkan kos menghantar anak-anak ke sekolah”.

**[ Menteri Pendidikan ]**

36. PR-1351-U(27)028

**Dato' Johari Bin Abdul [ Sungai Petani ]** akan mencadangkan :-

“Bahawa Dewan ini mengambil maklum bahawa, ramai kakitangan awam yang ada ilmu berniaga dan ada yang terlibat dengan perniagaan secara sampingan. Ramai yang mahu menceburkan diri dalam perniagaan secara langsung tetapi sayang akan hilang pencen jika berhenti dari perkhidmatan awam. Akhirnya mereka berada dalam dua alam dan tidak fokus kepada tugas sebenar. Adalah dicadangkan Kerajaan mengkaji semula dasar

membenarkan kakitangan awam berhenti dari perkhidmatan dan mendapat pencen.

Adalah dicadangkan jika seseorang kakitangan awam telah berkhidmat selama 21 tahun mereka boleh berhenti dan mendapat pencen. Ini samalah dengan anggota Angkatan Tentera Malaysia. Jika ini boleh dilakukan kita akan melihat mereka yang terlibat dalam perniagaan datang dari mereka yang ada pengalaman dan ada networking. Di samping itu tempat yang dikosongkan oleh mereka akan diisi oleh ramai lulusan pengajian tinggi yang tidak mempunyai kerja yang tetap atau sesuai”.

**[ Perdana Menteri ]**

37. PR-1351-U(27)029

**Tuan Fong Kui Lun [ Bukit Bintang ]** akan mencadangkan :-

“Bahawa dewan mencadangkan Kerajaan supaya mempergiatkan usaha untuk menyatupadukan rakyat berbilang kaum di Malaysia yang kelihatan masih lemah dan longgar meskipun Negara telah menjadi Negara merdeka

dan berdaulat sejak 60 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi Negara secara bersama dan merealisasikan Impian Malaysia”.

**[ Perdana Menteri ]**

38. PR-1351-U(27)030

**Tuan Fong Kui Lun [ Bukit Bintang ]** akan mencadangkan :-

“Bahawa dewan mencadangkan Kerajaan memulihkan pilihan raya kerajaan tempatan seluruh Negara supaya urus tadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat”.

**[ Menteri Kesejahteraan Bandar, Perumahan Dan Kerajaan Tempatan ]**

39. PR-1351-U(27)031

**Tuan Manivannan A/L Gowindasamy [ Kapar ]** akan mencadangkan :-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan.

Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama”.

**[ Menteri Kesejahteraan Bandar, Perumahan Dan Kerajaan Tempatan ]**

40. PR-1351-U(27)032

**Tuan Manivannan A/L Gowindasamy [ Kapar ]** akan mencadangkan :-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh pakar perubatan forensik sendiri bagi mewakili pihak keluarga si mati semasa bedah siasat dijalankan”.

**[ Menteri Dalam Negeri ]**

41. PR-1351-U(27)033

**Tuan Manivannan A/L Gowindasamy [ Kapar ]** akan mencadangkan :-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia”.

**[ Menteri Pendidikan ]**

42. PR-1351-U(27)034

**Tuan Wong Sze Phin @ Jimmy [ Kota Kinabalu ]** akan mencadangkan :-

“Bahawa Kerajaan Malaysia mengiktiraf Sijil Peperiksaan Bersepadu Sekolah-sekolah Menengah Persendirian Cina di Malaysia (Certificate of Unified Examination for Independent Chinese Middle Schools in Malaysia) ataupun

UEC sebagai sijil peperiksaan yang setaraf dengan Sijil Tinggi Pelajaran Malaysia (STPM).

Di Sabah, ibu bapa dari kaum dan bangsa selain Cina turut menerima dan memilih sistem pendidikan Sekolah Menengah Persendirian Cina. Malahan, jumlah pelajar di Sekolah - sekolah Menengah Persendirian Cina di Sabah yang bukan dari keturunan Cina adalah antara 25% sehingga 85%.

Kerajaan Sarawak telah mengiktiraf UEC sebagai peperiksaan yang diterima oleh perkhidmatan awam Sarawak. Kerajaan pusat juga telah berkali-kali menyatakan pertimbangan dalam mengiktiraf UEC.

Lebih 100 universiti dari 12 negara seperti Australia, UK, US dan lain-lain telah mengiktiraf UEC dan diterima sebagai sijil untuk memasuki universiti dan pusat pengajian tinggi sejak lebih tiga puluh tahun yang lepas.

Di sini, saya menggesa Dewan ini mengambil ketetapan untuk meluluskan cadangan bahawa UEC diterima oleh semua universiti, pusat pengajian tinggi tempatan dan juga perkhidmatan awam di Malaysia”.

**[ Menteri Pendidikan ]**

**RISALAT-RISALAT YANG DIBAWA KE DALAM MESYUARAT  
(DEWAN RAKYAT)**

<b><u>TAHUN 2017</u></b>	<b><u>RISALAT/DOKUMEN</u></b>	<b><u>TARIKH DIBENTANGKAN</u></b>
DR.2	Laporan Jawatankuasa Kira-Kira Wang Negara Projek NKEA Pertanian: EPP 6 – REPLIKA IZAQ -Kementerian Pertanian dan Industri Asas Tani	21 Mac 2017
CMD.1	Anggaran Perbelanjaan Mengurus Tambahan Pertama, 2016	21 Mac 2017
CMD.1A	Memorandum Perbendaharaan Mengenai Anggaran Perbelanjaan Mengurus Tambahan Pertama Tahun 2016 Bagi Kerajaan Malaysia.	21 Mac 2017
CMD.2	Anggaran Perbelanjaan Pembangunan Tambahan Pertama, 2016	21 Mac 2017
CMD.2A	Memorandum Perbendaharaan Mengenai Anggaran Perbelanjaan Pembangunan Tambahan Pertama 2016 Bagi Kerajaan Malaysia.	21 Mac 2017
CMD.3	Penyata Keluaran Wang Daripada Kumpulan Wang Luar Jangka Bagi Tempoh Dari 1 Januari 2016 hingga 31 Disember 2016, Menurut Peraturan 68 Di Bawah Peraturan-Peraturan Majlis Mesyuarat Dewan Rakyat.	21 Mac 2017
ST.6	Penyata Keluaran Wang Daripada Simpanan Luar Jangka Bagi Tempoh Dari 1 Januari 2016 hingga 31 Disember 2016, Menurut Peraturan Subseksyen 6(3) Akta Kumpulan Wang Pembangunan 1966.	21 Mac 2017

**\*\*UCAPAN-UCAPAN**  
**( PERATURAN MESYUARAT 17 BAHARU )**  
**( KAMAR KHAS )**

<b>Tarikh Ucapan</b>	<b>Ahli Yang Berucap</b>	<b>Tajuk Ucapan</b>	<b>Menteri Yang Bertanggungjawab</b>
1. 21.3.2017 (Selasa)	1. YB Tuan Hee Loy Sian (Petaling Jaya Selatan)	1. Permasalahan Projek Pakej D52 Dan D48 Pembinaan Rangkaian Paip Pembedungan Di Petaling Jaya Selatan	1. YB Menteri Tenaga, Teknologi Hijau dan Air
2. 21.3.2017 (Selasa)	2. YB Tuan Wong Tien Fatt @ Wong Nyuk Foh (Sandakan)	2. Masalah-masalah Kemudahan Di Hospital Duchess of Kent, Sandakan	2. YB Menteri Kesihatan

**\*\* Ucapan-ucapan Di Bawah Usul Berkenaan Perkara Tadbir Kerajaan (Peraturan Mesyuarat 17 Baharu)**